

**Uunga siunnersuut: Kalaallit Nunaannut suliffissarsiortut killilersimaarneqarnissaat pillugu Inatsisartut inatsisaata allanngortinneqarneranik Inatsisartut inatsisaat nr. xx, xx 2016-imeersoq**

*Inuussutissarsiornermut, Suliffeqarnermut, Niuernermut Nunanullu Allanut  
Naalakkersuisumit saqqummiunneqartoq*

**pillugu**

**Inuussutissarsiornermut Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Mimi Karlsen, Inuit Ataqtigiit, siulittaasoq  
Inatsisartunut ilaasortaq Justus Hansen, Demokraatit, siulittaasup tullia  
Inatsisartunut ilaasortaq Vivian Motzfeldt, Siumut  
Inatsisartunut ilaasortaq Nikolaj Jeremiassen, Siumut  
Inatsisartunut ilaasortaq Kelly Berthelsen, Inuit Ataqtigiit

UKA2016-imi ulloq 29. september 2016-imi siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Inuiaqatigiinni ineriartornerup kingunerisaanik taaguutit ilaasa naleqqukkunnaarsimasut inatsimmi nutarterneqarnissaat imaluunniit suliffissaqartitsiniutit nutaat kingunerisaannik Kalaallit Nunaannut suliffissarsiortut pillugit inatsisip atuuttup nutarterneqarnissaa Naalakkersuisut siunnersuuteqarnermikkut kissaatigaat.

Siunnersuummi ilaatigut ilinniagaasinnaasut taaguutaat nutaat aamma suliffeqarnermi ineriartortuartumi pissutsit naapigiarnearput, atorfinnut taaguutit soorlu isumaginninnermi siunnersorti aamma perorsaasoq peerneqarlutik, taakku naleqquttutut isigineqarunnaarmata.

Aammattaq inatsisip atuuffigisaani atorfiit ilasinnaaneranut ilanngarsinnaanerinnuunniit aalajangersakkanik aalajangersaanissamut siunnersuutikkut Naalakkersuisut piginnaatinneqarput.

### **Siunnersuutip Inatsisartuni siullermeerneqarnera**

Inatsisip suliffeqarnermi pissutsinut ersersitsillunilu sapinngisamik naapertuuttumik maleruagassiiisoqquullugu nutarterneqarnissaa siullermeerinninnermi tapersersorneqarpoq. Najukkami sulisinnaasut salliutillugit sulisussarsiarineqartarnissaannik anguniagaqarnerup inatsisikkut ikorfartorneqarnissaa Naalakkersuisunit eqqumaffiguarneqartariaqartoq aamma saqqummiunneqarpoq.

### **Tusarniaanermut akissutit**

Siunnersuut piffissami 2016-imi 27. maajimit 27. juunimut pisortat tusarniaanermut nittartagaanniippoq.

Siunnersuummut tusarniaanermut allakkiortoqarpoq, soorluttaaq tusarniaanermut akissutit siunnersuummut nassuiaatini nassuiarneqarlutillu oqaaseqarfigineqartut.

Takornariaqarnermut tunngasut pillugit oqaaseqaatit erseqqissaatiginissaat ataatsimiititaliap tunngavissaqarsoraa, tassa tamanna siullermeerinninnermi aamma taasaqarfigineqarmat. Takornarianik angallassisartut avataaneersut najukkani sulisinnaasut inangerlugit nunatsinni sulinissaasa siunnersuutikkut ajornannginnerulersinneqarnissaa tusarniaanermut akissutini ataasiakkaani siullermeerinninnermilu oqaaseqartartut oqaaseqaataanni isumakuluutigineqarpoq.

Tassunga atatillugu Naalakkersuisut oqaatigaat aalajangersagaq siunnersuutigineqartoq maanna malittarisassanik atuuttunik erseqqissaanerusoq, taamaasillunilu sulisussat aalajangersimasut najugaqarsinnaanermut sulisinnaanermullu qinnuteqaqqaaratik Kalaallit Nunaanni qaammatit pingasut angullugit sulisinnaallutik. Tamatumalu ilaatigut kinguneraa oqaatsitigut, assersuutigalugu kinamiusut japanimiusut, immikkut piginnaaneqartunik takornariartitsisulerlugit nunani allamiut ingerlatsisut angalaqatigiinnik ingerlatsisinnaanerat maannamutut suli periarfissaammat. Tamatumali sulisussat ukioq naallugu sulisuusussaasut kommunimiit sulisinnaanermut akuersissummik peqaqqaartussaanerat allanngortinngilaa. Tamannalu Naalakkersuisut takornariartitsinermi 2016-2020-imi periusissiaannut naapertuuppoq, tamatumani immikkut qulakkeerniarneqarsimammat takornariartitsinerni nioqqutit unammillersinnaasunik atugassaqartitsilluni akeqartitsillunilu nioqqutigineqartarnissaat. Takornariartartut amerleriarnissaat najugaqavissut takornariartitsinermi sulisorineqalernissaannut tunngaviuvoq.

Naalakkersuisut oqaaseqaataat ataatsimiititaliamit tusaatissatut tiguneqarput, tassungalu atatillugu kaammattuutigineqaannassaaq nunatsinni takornariaqarnermik ingerlatsisut nukittorsarneqarnissaat siunnerfilimmik suliniutigineqassasoq, tamatumani siunertarineqassalluni assersuutigalugu angalaqatigiinnik angalatitsinermut atatillugu kiffartuussinerup ilaata annertunerusup taakkuninnga tiguneqarneqarnissaa.

**Ataatsimiititaliap siunnersuummik suliarinninnera**

Inatsimmi taaneqartut saniatigut ilinniakkanut nunatsinni ingerlanneqarsinnaasunut allanut inatsisip atuussinnaanera pillugu aalajangersakkamik aalajangersaanissamut inatsit Naalakkersuisunut piginnaatitsisoq ataatsimiititaliamit maluginiarneqarpoq. Inatsisip atuuffiata nunatsinni ilinniartitaanernut nutaanut naleqqussarneqarsinnaanissaa aammalu siunissami sapinngisamik assigiinngitsuni amerlanerpaani najukkani sulisartut atorfinitsinneqartarnissaasa qulakkeerneqarnissaa aalajangersakkakkut siunertarineqarput. Tamatuma kinguneraa suliffissatut periarfissat piviusumik naliliiffigineqarnissaat, tamatumalu peqatigisaanik iliniartitaanerit nutaat taakku nunatsinni suliffeqarnermi pisariaqartitanik matussusiinersut naliliiffigineqarsinnaalluni. Aammattaaq suliffeqarnikkut ineriartorneq ilutigalugu inatsisip atuuffissaata naleqqussarnissaa siunnersuutikkut aqqutissiuunneqarpoq.

Kiisalu siunnersuutip kingunerisaanik piffissamut killigaanngitsumut kommunit akuersissuteqarsinnaajunnaarmata pisariaqarpallu akuersissutip ukiunik marlunnik sivilisussuseqartup qaangiutinnginnerani sulisartup avataaneersup sulisitsisuata nutaamik qinnuteqartariaqarnera ataatsimiititaliamit maluginiarneqarpoq.

Naggasiullugu ataatsimiititaliamit iluarisimaarlugu maluginiarneqarpoq nalunaarusiortarnissaq, tassungalu ilanngullugu taassuma imarisassai akulikissusissaalu pillugit erseqqinnerusumik aalajangersaanissamut Naalakkersuisut siunnersuutikkut piginnaatinneqartut. Atorfiit sorliit piumaneqarnersut pillugu Naalakkersuisut ilisimasaqalernissaat kommunit nalunaarusiaatigut periarfissinneqassaaq, taamaaliornikkut nunatsinni piginnaanngorsaqqinnissamut periarfissat tamatumunnga naapertuuttumik aaqqissuunneqarsinnaaqullugit. Kommunit nalunaarusiaannut ilaasinnaassapput qaammatit tamaasa qinnuteqartut qassiunerat sulianilu ataasiakkaani kommunalbestyrelsip aalajangersimaneri.

**Siunnersuutip aningaasaqarnikkut kingunerisassai**

Siunnersuutip aningaasaqarnikkut allaffissornikkullu kingunerisassai siunnersuummut nalinginnaasunik nassuiaatini, imm. 3 aamma 4, Naalakkersuisunit nassuiaatigineqarput. Tamatuma annertunerusumik oqaaseqarfiginissaa ataatsimiititaliamit tunngavissaqartinneqanngilaq.

**Ataatsimiititaliap inassuteqaatai**

Ataatsimiititaliap isumaqatigiittup siunnersuut akuerineqassasoq inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassangortippaa.




Mimi Karlsen, Siulittaasoq,  
sinnerlugu




Justus Hansen



Vivian Motzfeldt



Nikolaj Jeremiassen



Kelly Berthelsen